

de Fourpach; depart nous maistre eschaving, les trezes, les contes jureiz, les pairaiges et toute la communautai de la citei de Mes Nicolles Baudoiche et Ponices de Vy; depart nous citoiens et communautai de Verdun Pierres de Hairaucourt; depart nous citains et communautai de Toul Jehans de Rozieres; et depart nous signours et bonnes villes dessus dites communement Ferris conte de Salverne, li noefymes. (17) Et doivent cil noef par lour sairmens sor ceu corporeilment fais en bonne foi a tous ceaulz de ces communes trues, qui averont eut damaiges et auz queil om averoit meffait, auz pources anci com auz riches, communes sentences et communs iugemens dire et doivent cognoistre, se cilz ou ceaulz, des queil reclains averoit estei fais a eulz, ont point mespris encontre ces communes trues ou non. Et ceu ne doivent il laisser a dire ne a faire pour doute, pour amour, pour graice ou pour avancement des signeurs, des bonnes villes, de ceaulz qui se plainderoient ou dautres. Les queilz noef par lour sairement fais az sains corporeilment ne doivent painre don de personne, que que elle soit, ne avoir esperance de dons faire a oulz ne a autres pour eaulz de ceu que az dites trues aipartient. (18) Et tout ceu que li noef ou li plus grant partie deaulz cognoistront par leur sairement, si com dessus est escrit, contre tous ceus qui averont mespris ou fait contre les dites communes trues, la doivent li signeurs, les bonnes villes et tuit cil, qui sont de ces communes trues et qui an seront, par leur sairmens en bonne foi et sens delay estre aidans, a ceu que li plaignans soit restaublis de ces damaiges et li tropfais amandeis. Et doivent et puent li signeurs et les bonnes villes, deleis les queilz li damaiges seront venus, requerir les autres signeurs et les bonnes villes, qui seront de ces trues, que lour soient aidans, et il le doivent faire par sairement enci, com li noef ou li plus grant partie deaulz an cognoistront ou jugeront par leur sairement, si com escript est en ces presentes lettres, jusques aiant, que li damaiges et tropfais serait aidrecies sens mal enging. (19) Li noef dessus nommeis, tant com ces trues duerront, doivent chescun an quatre fois venir a Mes ensemble, cest a savoir a loctave de Noiel, a loctave de Paisques, a loctave de la saint Jehan et auz octaves de la saint Remey, et demoreir tant, com necessitei serait por delivreir et aidrecier lez plaignans. Et si mestiers nestoit, que li dis noef veinssent^a plus souvent ansamble, que les

a) Oder 'venissent' Or.